



## AGTSTE VERBONDSMAAL EN VOLKSKONSILIE VAN DIE GELOFTEVOLK IN SUID-AFRIKA

**Datum en Plek:** D.V. 10-12 April 2020 te Orania Volksskool.

**Tema:**  
**‘n Loflied op die Almag en Genade van JHWH [1]**

Hierdie byeenkoms is legitiem ingevolge: Deut.16:16

Drie maal in die jaar moet al jou manne voor die Aangesig van die HERE jou God [JHWH jou AeLoHiJM] verskyn op die plek wat Hy sal uitkies; **op die fees van die ongesuurde brode** en op die fees van die weke en op die huttefees; en hulle mag nie met leë hande voor die aangesig van die HERE [JHWH] verskyn nie;

Met die tema in gedagte, moet ons deelname aan die volksbyeenkoms sodanig wees dat dit sal getuig van die Almag en Genade van JaHWeH [die HERE]. Wanneer ons i.t.v. Deut.16:16 voor Sy Aangesig verskyn, sal dit gepas wees as ons optrede van ‘n loflied sal spreek soos opgeteken in Ps.95:2 [2], want Hy woon onder die lofsange van Israel Ps.22:4 [3].

Hierdie spesifieke feestyd, wat handel oor die instelling van die Nagmaal [Verbondismaal], het sy ontstaan te danke aan die instelling van die Pasga en die daaropvolgende uittog uit Egipte. Binne hierdie verband word die Almag en Genade van JaHWeH [die HERE] deel van ons alledaagse bestaan in die versoening en verlossing wat JaHshua [Jesus] vir ons met Sy dood en opstanding teweeg gebring het.

Volgens Deut.16:16 berus die aanwys van die vergaderplek by JaHWeH, wat in hierdie geval Orania is. U kan met reg vra, maar hoe op aarde kan die sameroepers van hierdie byeenkoms so iets sê? Die eenvoudige antwoord is dat God ‘n sisteem daar gestel het waardeur Hy geraadpleeg kan word ten einde Sy Wil te wete te kom [4]. Ons is bewus

<sup>1</sup> **JaHWeH/die HERE:** Die 1993 Nuwe Vertaling van die Bybel onder redaksie van Prof. W. Vosloo en Prof. F. van Rensburg beskryf in die voetnotas die **bekendmaking van die Naam van die HERE**. Die naam “Jahwe” is bekendgemaak toe Moses na die Naam van God vra. Hier is die eerste keer wat die eienaam “Jahwe” bekendgemaak was. (Bron: Bybel in Praktyk, 1993, Eks. 3, Eks. 6, p.98,99,102,103).

**Jahshua/Jesus.** Die 1995 Almanak en Bybelse dagboek van die Hervormde Kerk verduidelik die oorsprong van die naam “Jesus”. “Die benaming, Jesus, is die Griekse weergawe van die bekende Hebreëuse naam **Jeshua, Joshua, Jehoshua** wat beteken: **Jahwe is heil, redding en verlossing.**” (Bron: NHK Bybelse dagboek, 17 Maart 1995, p.56)

<sup>2</sup> **Ps.95:2** Laat ons Sy Aangesig tegemoetgaan met lof, met lofsange Hom toejuig!

<sup>3</sup> **Ps.22:4** Tog is U die Heilige wat woon onder die lofsange van Israel!

<sup>4</sup> Sien die studie Die Lotkroniek - [https://www.volksvergadering.co.za/Documents/2014111581230\\_item\\_2014-04-07-Die-Lot-Kroniek-9.2.pdf](https://www.volksvergadering.co.za/Documents/2014111581230_item_2014-04-07-Die-Lot-Kroniek-9.2.pdf)

daarvan, en het begrip daarvoor dat meeste Skrifgelowiges nie kennis dra van die sisteem nie, wat die bekendstelling hiervan soveel noodsaakliker maak. Naas die vergaderplek is die besprekingspunte en sprekers ook deur God Almagtig aangewys by wyse van die sisteem, wat bestaan uit Raadpleging en lotsbeslissing –

**Spreek 16:33** In die skoot word die lot gewerp, maar elke beslissing daarvan kom van die HERE [JHWH].

Min mense weet dat Andries Pretorius by wyse van lotsbeslissing as die bevelvoerder van die Kommando teen Dingaan aangewys is, waartydens God 'n gelofte met Hom toegelaat het <sup>5</sup>. Matthías as 12de apostel in die plek van Judas, is ook by wyse van lotsbeslissing aangewys - Hand.1:26 <sup>[6]</sup>. Naas grootskaalse onkunde onder ons as volk, het lotsbeslissing vir sommige volksgenote 'n bespotting geword, tot oneer van JHWH [die HERE] wat Sy Wil en Weë deur die Skifte bekend maak.

Die huidige toedrag van sake m.b.t die politieke- en morele stand in hierdie land, noop mense om selfondersoek te doen [om die balk in eie oog te soek], wat die heroorweging van tradisionele geloofsopinies noodsaak. Binne hierdie verband is dit 'n kerklike oortuiging dat die Ou Testament afgehandel is, wat waar is, maar dit beteken nie dat die Skrifte wat as Die Ou-Testament in die Bybel gedokumenteerd is, afgehandel is nie. Ons verkeer tans onder die vloeke soos beskryf in Deut.28 en verwag die instelling van die Nuwe Verbond soos geprofeteer is in Jer.31:33-34 <sup>[7]</sup>. Sag.14 spreek van die wederkoms, Ps.22 van die “kruisiging” en dies meer, en Paulus sê dat die **hele Skrif** is gegee tot lering, ens. <sup>[8]</sup>. Hierdie **“heilige en hele Skrif”** waarvan Paulus melding maak het betrekking op die Ou Testamentiese geskrifte.

Vir te lank het hierdie volk hul deur hul eie begeerlikhede en verleiers laat lei, vanwaar die gebrek aan kennis van bv. lotsbeslissing. Daarom gaan dit met ons soos beskryf in Jes.30:1-3, waar ons planne uitvoer wat nie van Hom af is nie, verbonde sluit wat nie deur Sy Gees gedrewe is nie, wat hul toevlug soek by oorseese moonthede en op hul prinse vertrou, maar wat weier om God se Mond te raadpleeg; daarom moet hulle wat op prinse en die vleeslike arm vertrou, hierdie Skrif as 'n waarskuwing beskou, andersins sal dit die onverskilliges tot skande wees. Jesaja sê in hoofstuk 8 verse 19-20 dat Sy volk Hom moet raadpleeg, en indien nie, daar vir hul geen dageraad sal wees nie.

Daarom word hierdie herinnering aan God se opdrag met vrymoedigheid aan u as Sy volk gerig. As hierdie volk 'n nuwe dagbreek wil beleef, sal ons ons eiesinnigheid moet laat staan en ons onderwerp aan God se Wil by wyse van Raadpleging en Lotsbeslissing soos in Jes.8:19-20 en 30:1-3 uitgewys is.

In **Sef.1:6** staan die volgende: **“Ook die wat van die HERE *afvallig* word en *wat die HERE nie soek en Hom nie raadpleeg nie.*”** Vanaf die begin van die hoofstuk word

---

<sup>5</sup> Sien: “*Journal der Expeditie van de uitgewekene Boeren ...*” gehou deur JG Bantjes in Bylae tot De Zuid-Afrikaan, 14 Juny (sic) 1839.

<sup>6</sup> **Hand.1:26** Toe werp hulle die lot, en die lot het op Matthías geval; en hy is gekies om saam met die elf apostels te wees.

<sup>7</sup> **Jer.31:33** Maar dit is die verbond wat Ek ná dié dae met die huis van Israel sal sluit, spreek die HERE: Ek gee my wet in hulle binneste en skrywe dit op hulle hart; en Ek sal vir hulle 'n God wees, en hulle sal vir My 'n volk wees. **:34** En hulle sal nie meer elkeen sy naaste en elkeen sy broer leer nie en sê: Ken die HERE; want hulle sal My almal ken, klein en groot onder hulle, spreek die HERE; want Ek sal hulle ongeregtheid vergewe en aan hulle sonde nie meer dink nie.

<sup>8</sup> **2Tim.3:13** Maar goddelose mense en bedrieërs sal voortgaan van kwaad tot erger, hulle wat verlei en verlei word. **:14** Maar bly jy in wat jy geleer het en waarvan jy verseker is, omdat jy weet van wie jy dit geleer het, **:15** en dat jy van kleins af die heilige Skrifte ken wat jou wys kan maak tot saligheid deur die geloof in Christus Jesus. **:16** **Die hele Skrif is deur God ingegee en is nuttig tot lering, tot weerlegging, tot teregwyding, tot onderwysing in die geregtigheid, :17** sodat die mens van God volkome kan wees, vir elke goeie werk volkome toegerus.

verskeie gruwels beskryf waaroor JHWH [die HERE] besoeking sal doen, waaronder hulle wat Hom nie deur raadpleging soek, ter sprake is. Ons verkeer onder 'n gees van afvalligheid, lees weer Sef.1:6!

Ons opregte en ernstige oproep tot u, is dat u onbevooroordeeld die Skrifte sal ondersoek en God se Wil sal soek doen.

Hierdie kennisgewing om die Nagmaal [Verbondsmaal] en die gepaardgaande volksbyeenkoms by te woon, is eintlik in terme van **Deut.16:16** 'n oproepinstruksie:

Die feeste, wat deel is van die Wet, moet nog steeds herdenk word. Paulus het in Hand.18:21 hom voorgeneem om die volgende fees by te woon en in Kolosense 2:16 het hy die volgende geskrywe: *“Laat niemand julle dan oordeel in spys of in drank of met betrekking tot 'n fees of nuwemaan of sabbat nie,”*. Christus as offer het die Levitiese offers volbring en die Melgisedek Orde ingestel, waarvan Hy ewige Hoë Priester is. Paulus, 'n Apostel in Sy diens, het die bestaan van die feeste erken, en erken ons dit met die herdenking van die Nagmaal, Pinkster en Huttefees. Die Orde van Melgisedek kan tog nie sonder orde/wette wees nie!

Die Verbondsmaal/Nagmaal vind D.V. op Goeie Vrydag plaas, wat vasgestel word d.m.v. die nuwemaan, die volmaan en die Maart ewening. Dit herinner aan die kalender waarna Paulus in Kol.2:16 verwys, welke kalender die rede is waarom Goeie Vrydag, Hemelvaart en Pinkster se Gregoriaanse datums jaarliks verander [Lees ook Gen.1:14, Ex.12.].

Hiermee is volksgenote wat Jahshua die Messias [Jesus die Christus] bely as die Seun van JaHWeH [die HERE - Eindnota <sup>1</sup> ], die 1933/53 Afrikaanse Bybel as openbaarmaking van die Wil en Werke van God Almagtig aanvaar, en wie se lewe en strewe dit is om Sy Wil te doen, welkom om hierdie verrigtinge by te woon.

## **VERBONDSMAAL VAN DIE GELOFTEVOLK IN SUID-AFRIKA**

**Vrydag 10 April** Verbondsmaal / Nagmaal:

18h00 – 19h00 Elke gesin bring hul eie voorafbereide maaltyd asook hul ongesuurde brood en vrug van die druiwestok saam waartydens die herdenking van dié instelling sal plaasvind.

19h00 Herdenkingsdiens – Dr. Ronnie van der Merwe

## **VOLKSKONSILIE VAN DIE GELOFTEVOLK IN SUID-AFRIKA**

Die doel van dié byeenkomste is om eietydse- geloofsvraagstukke en toekomsverwagtinge binne die Geloftevolk aan te spreek. Die nastrewing van 'n Teokratiese bestel [9] soos besluit tydens die 2009 Volksvergadering, herinner mens

---

<sup>9</sup> Die totstandkoming van 'n Teokratiese bestel is deel van die besluite van die 2009 Vegkop Volksvergadering. Hiermee die vernaamste besluite wat tydens dié Volksvergadering geneem is:

daaraan dat jy jou moet beywer vir die Koninkryk van die hemele soos dit in die evangelies opgeteken is, met JaHshua [Jesus] as koning. Binne Bybelse- en taalkundige terme kom dit neer op 'n Melgisedek-krasie. JaHshua **is** vir ewige Hoë Priester volgens die Orde van Melgisedek. Hierdie Orde is nie deel van die sekulêre Nuwe Wêreldorde nie [NWO].

Die tempo waarteen die NWO beslag kry, noop ons om ons huis in orde te kry. Binne gelofteverband moet 'n huis gestig word waar dit God behaag, wat beteken dat 'n bestel volgens Bybelse norme tot stand moet kom [10]. Met dit in gedagte is dit baie betekenisvol dat besprekingspunte soos “*Die Orde van Melgisedek*” en “*JaHshua as Leerowerste in ons midde*” by wyse van lotsbeslissing op die sakelys is. Dit beklemtoon die erns van die saak dat ons ons huis in orde moet kry, welke huis in terme van die 1838 Geloofte tussen God en volk ooreengekom is en die taak van die geloftepligtiges is: “*dat zoo wy de overwinning verkrygen mogen, wy den Heere tot zyns naams gedachtenis, **een huis stichten zullen**, alwaar Hy ons zulks aanwyzen zal;*” [11]. Ons staan voor 'n keuse: om deel te word van die NWO, of om as Sy verstrooide gemeente hier duskant die riviere van Kus by Sy Naam skuiling te soek. [Sef.3:9-12]

### **Saterdag 11 April**

#### **Tema: 'n Loflied op die Almag en Genade van JHWH**

08h00- 08h45	Opening, verwelkoming en ordening.
08h45 – 09h15	Jahshuah as die Leerowerste in ons midde – <i>Dr. Ronnie van der Merwe</i>
09h15 – 09h45	Bespreking
09h45 - 10h00	Blaaskans
10h00 - 10h30	Die geestelike betekenis van Rigters 7:7-9 [12] - <i>Jurgens van Zyl</i>
10h30 - 11h00	Bespreking
11h00 - 11h30	Die Melgisedek Orde - <i>Flip Swanepoel</i>
11h30 - 12h00	Bespreking

---

1. Die Geloftedolk se vrywordingsproses moet geskoei word op die grondslag van die Volksgeloftes, naamlik: Van Riebeeck Geloofte 1654, Bloedrivier Geloofte 1838 en Paardekraal 1880. [Majubadag as dag van verootmoediging en eerbied teenoor God Almagtig geniet dieselfde status as die Geloftes.]

6. Die toekomstige staatsmodel van die vrye Geloftedolk, Skrifgefundeerd (op Bybel gegrond) moet wees.

9. Dat die nakoming van die Volksgeloftes 'n Teokratiese staatsmodel vereis. 'n Komitee is saamgestel om die funksionering van 'n Teokratiese staatsbestel te ondersoek om by 'n volgende Volksvergadering aan die Volk voor te lê vir oorweging. [Dit is tydens die 2010 Volksvergadering te Nampo voorgelê en aanvaar met die wysiging van een paragraaf, wat voorgelê en algemeen aanvaar is tydens die 2011 Volksvergadering te Orania.]

Die Geloftedolk Koördineringskomitee is nie 'n organisasie nie en is deur die volk aangewys tydens die 2009 Volksvergadering, met die taak om die besluite van die Geloftedolk ten uitvoere te bring.

<sup>10</sup> [https://www.volksvergadering.co.za/Documents/20151029112141\\_item\\_2012-Referaat---Vervulling-van-die-1838-Geloofte.pdf](https://www.volksvergadering.co.za/Documents/20151029112141_item_2012-Referaat---Vervulling-van-die-1838-Geloofte.pdf)

<sup>11</sup> Aanhaling uit die Joernaal van die Strafeekspedisie teen Dingaen, gehou deur JG Bantjes, gepubliseer in De Zuid-Afrikaan, 14 Juny(sic) 1839. Beskikbaar in: [https://www.volksvergadering.co.za/Documents/2014111575959\\_item\\_2011-08-26-Outentieke-Geloofte-van-Bloedrivier.pdf](https://www.volksvergadering.co.za/Documents/2014111575959_item_2011-08-26-Outentieke-Geloofte-van-Bloedrivier.pdf)

<sup>12</sup> **Rig.7:7** Toe sê die HERE vir Gideon: Deur die drie honderd man wat gelek het, sal Ek julle verlos en die Midianiete in jou hand gee; maar al die ander manskappe kan elkeen na sy woonplek gaan. :8 Daarop neem hulle die padkos van die manskappe en hulle ramshorings in hul hand; en hy het al die manskappe van Israel laat gaan, elkeen na sy tente toe; maar die drie honderd man het hy agtergehou, terwyl die laer van die Midianiete onderkant hom in die laagte was. :9 En daardie nag het die HERE vir hom gesê: Staen op, gaan af in die laer, want Ek gee dit in jou hand.

12h00 – 12h30	Jes.8:19-20 [13] - <i>Johan Erasmus</i>
12h30 – 13h00	Bespreking
13h00 - 14h00	Ete – selfvoorsienend.
14h00 – 14h30	Jes.30:1-3 [14] – <i>Pieter Kruger</i>
14h30 – 15h00	Bespreking
15h00 – 15h30	Geloftevolk as diensknegte van die Allerhoogste – <i>Kobus Botes</i>
15h30 – 16h00	Blaaskans
16h00 – 16h30	Bespreking
16h30 - 17h00	Samevatting van dag se verrigtinge
17h00	Dag afsluiting en gesellig saam verkeer daarna

### **Sondag 12 April**

08h00- 08h15	Verwelkoming en ordening.
08h15 – 09h15	Verootmoedigings diens – <i>Willie du Plessis</i>
09h15 – 09h30	Blaaskans
09h30 - 10h00	Verhouding [verwantskap] tussen die Verbondsark en die te stigte huis van Bloedrivier - <i>Migael Lombard</i>
10h00 - 10h30	Bespreking
10h30 - 11h00	Skriftuurlike betekenis van land m.b.t. ons volksgeloftes - <i>Carel Lemann</i>
11h00 - 11h15	Blaaskans
11h15 – 11h45	Bespreking
11h45 – 12h15	Dan.9:24,25 [15] – <i>Tienie Dumas</i>
12h15 – 12h45	Bespreking
12h45 – 14h00	Ete selfvoorsienend
14h00 – 14h30	Die skriftuurlike betekenis van Paardekraal- <i>Phillip Groenenstein</i>
14h30 - 15h00	Bespreking
15h00 – 15h30	Opstelling van die Handeling van die Volkskonsilie
15h30	Afsluiting

## **Ordereelings van die Volksvergaderings van die Geloftevolk van Suid-Afrika**

1. Reg van toegang is voorbehou vir die Geloftevolk wat as volg bely en gedefinieer is:

1.1. Opsomming van wet:

**Mat. 22:35-40** [1933/53 *Afrikaanse Bybel*]

35 En een van hulle, 'n wetgeleerde, het 'n vraag gestel om Hom te versoek en gesê:

<sup>13</sup> **Jes.8:19** En as hulle vir julle sê: Raadpleeg die geeste van afgestorwenes en die geeste wat waarsê, wat piep en mompel—moet 'n volk nie sy God raadpleeg nie; moet vir die lewendes die dooies gevra word? **:20** Tot die wet en tot die getuienis! As hulle nie spreek volgens hierdie woord nie, is hulle 'n volk wat geen dageraad het nie.

<sup>14</sup> **Jes.30:1** Wee die opstandige kinders, spreek die HERE, wat 'n plan uitvoer, maar dit is nie uit My nie; wat 'n verbond sluit, en dit is nie uit my Gees nie, om sonde op sonde te stapel; **:2** wat gaan om na Egipte af te trek, en hulle raadpleeg my mond nie, om toevlug te soek onder die beskutting van Farao en om te skuil in die skaduwee van Egipte. **:3** Maar die beskutting van Farao sal julle tot skande wees, en die skuiling in die skaduwee van Egipte tot smaadheid.

<sup>15</sup> **Dan,9:24** Sewentig sewetalle is oor jou volk en jou heilige stad bepaal, om die goddeloosheid te voleindig en om die maat van die sondes vol te maak en om die ongeregtigheid te versoen en om ewige geregtigheid aan te bring en om gesig en profeet te beseël en om wat hoogheilig is, te salf. **:25** Nou moet jy weet en verstaan: van die uitgang van die woord af om Jerusalem te herstel en op te bou tot op 'n Gesalfde, 'n Vors, is sewe sewetalle; en twee en sestig sewetalle lank sal dit herstel en opgebou word, met pleine en slote, maar in tye van benoudheid.

36 Meester, wat is die groot gebod in die wet?

37 En Jesus antwoord hom: Jy moet die Here jou God liefhê met jou hele hart en met jou hele siel en met jou hele verstand.

38 Dit is die eerste en groot gebod.

39 En die tweede wat hiermee gelykstaan: Jy moet jou naaste liefhê soos jouself.

40 Aan hierdie twee gebooie hang die hele wet en die profete.

1.2. Bely dat JaHshua die Messias [Jesus die Christus] is en dat Hy die Seun van JaHWeH [die HERE] is en dat Hy die enigste Middelaar is tot die Ewige Lewe in die koninkryk van JHWH [die HERE].

1.3. Die Geloftesvolk is daardie volk wat gebonde is aan God Almagtig weens die Skrifte en gekenmerk word deur ons geskiedenis, vernameklik deur die geloftes wat sedert volksplanting tot stand gekom het, naamlik:– Die Geloftes van: Van Riebeeck [1654]; Bloedrivier [1838] en Paardekraal [1880]. Ons is vanaf die begin Geloftesvolk. Alhoewel ons ook as Boerevolk en Afrikanervolk bekend staan, vind ons grootste en vernamekste byeenkomste nog steeds rondom ons Geloftes plaas!

2. Afrikaans is die taal waarin die vergaderings plaasvind.
3. Die doel en tema van die vergadering soos uiteengesit in die uitnodiging vorm die grense waarbinne daar debat gevoer sal word.
4. Volksgenote is welkom om ander sake aan die komitee op te dra vir toekomstige vergaderings.
5. Geen persone of instansies mag verkleineer of bevorder word nie.
6. Deelnemers aan die vergaderings word versoek om op eerbiedige wyse die aanspreekvorme van ons hemelse Vader, Seun en Heilige Gees te gebruik waarmee hulle vertrou is.
7. Die vergaderings distansieer hul van enige gewelddoed teen die huidige bestel, wat 'n strafgerig is wat oor ons gekom het, en enige opruiende deelname of verwante optrede sal tydens die verloop van die vergaderings buite orde wees, tog ywer die vergaderings om hierdie strafgerig te beëindig deur die Aangesig van ons hemelse Vader te soek.
8. Die besluite van die vorige volksvergaderings van die Geloftesvolk is bindend op daaropvolgende vergaderings, vernameklik:
  - 8.1. Die Geloftesvolk se vrywordingsproses moet geskoei word op die grondslag van die Volksgeloftes.
  - 8.2. Dit noodsaaklik is dat alle middele aangewend word om die Geloftesvolk in stand te hou.
  - 8.3. Die toekomstige staatsmodel van die Geloftesvolk, Skrifgefundeerd (op Bybel gegrond) moet wees.
  - 8.4. Dat die nakoming van die Volksgeloftes 'n Teokratiese staatsmodel vereis, soos hanteer is deur die Teokratiese Komitee en aanvaar is tydens die Orania Volksvergadering van 2011.
  - 8.5. Die volgende Teokratiese beginsels word reeds deur die komitee geïmplementeer:
    - 8.5.1. Raadpleging d.m.v. lotsbeslissing as Teokratiese beginsel word toegepas om die Wil van ons hemelse Vader te wete te kom. Dit word verder omskryf in dokumentasie wat deur die GKK en die TK [Teokratiese komitee] opgestel is, nl. Die Teokratiese verslag [Hoofstuk 2.6.2] asook in Die Konsep Grondwet, par.77.2 en verder.

**Spreek 16:33** In die skoot word die lot gewerp, maar elke beslissing daarvan kom van die HERE [JHWH]. [1933/53 Afrikaanse Vertaling.]

8.5.2. Die vergadertye van die Geloftesvolk is in ooreenstemming met:

**Deut.16:16** Drie maal in die jaar moet al jou manne voor die aangesig van die HERE [JHWH] jou God [El] verskyn op die plek wat Hy sal uitkies; op die fees van die ongesuurde brode en op die fees van die weke en op die huttefees; en hulle mag nie met leë hande voor die aangesig van die HERE [JHWH] verskyn nie; [1933/53 Afrikaanse Vertaling.]

9. Kennisgewing van vergaderings moet vooraf geskied by wyse van hetsy, plakkate, pamflette in posbusse, radio en koerant advertensies, epos, elektroniese media- en platvorms, en persoonlike uitnodigings.

## **Eindnotas**

---

<sup>i</sup> **JaHWeH/die HERE**: Die 1993 Nuwe Vertaling van die Bybel onder redaksie van Prof. W. Vosloo en Prof. F. van Rensburg beskryf in die voetnotas die **bekendmaking van die Naam van die HERE**. Die naam “**Jahwe**” is bekendgemaak toe Moses na die Naam van God vra. Hier is die eerste keer wat die eienaam “Jahwe” bekendgemaak was. (Bron: Bybel in Praktyk, 1993, Eks. 3, Eks. 6, p.98,99,102,103).

**Jahshua/Jesus**. Die 1995 Almanak en Bybelse dagboek van die Hervormde Kerk verduidelik die oorsprong van die naam “**Jesus**”. “Die benaming, Jesus, is die Griekse weergawe van die bekende Hebreeuse naam **Jeshua, Joshua, Jehoshua** wat beteken: **Jahwe is heil, redding en verlossing.**” (Bron: NHK Bybelse dagboek, 17 Maart 1995, p.56)